



**PLEASE DO NOT REMOVE  
CARDS OR SLIPS FROM THIS POCKET**

---

**UNIVERSITY OF TORONTO LIBRARY**

---

DS  
913  
•392  
4545  
1919

EAST ASIAN LIBRARY  
UNIVERSITY OF TORONTO LIBRARY  
130 St. George Street  
8th FLOOR  
TORONTO, CANADA M5S 1A5

gift



忠節錄

HARVARD-YENCHING LIBRARY  
HARVARD UNIVERSITY  
2 DIVINITY AVENUE  
CAMBRIDGE, MASSACHUSETTS  
PANMUN  
DEC 12 1968  
NO LONGER PROPERTY OF  
HARVARD-YENCHING LIBRARY



李義士公忠名節錫序

去士々々特立獨行

者惟義之是視既

辨得一義字公砥

柱萬仞正直不撓

雖天樣大事一處之

裕如竊料程義士公

當日之義直自秉

彝中一流出來輪囷

鼎血炳然如丹之硃

一輝 天地動色以目

家一躬子隱然為

綱常一之五報先帝

之殊恩伸大義於

當年使天下後世

之為人臣子者  
知此角義理  
直古直今  
擲撲不破  
龍牙偉哉  
後孫某甫  
辛義收  
錫以海  
前之所  
來

後即重利之義我復

大明亦世無愧為

忠臣之孫之道

感歎果為之序

宗祧後五已未膺

月之辭庶陵李相爽

謹撰

李義士公忠節錄目錄

卷之一

仁廟朝祭墓 筵教

顯廟朝錄用子孫 筵奏

肅廟朝 筵奏

正廟朝贈職旌閭 傳教

子孫調用 傳教

書院給祭需時禮曹儀啓

宣額忠節祠時禮曹儀式

正廟朝親製賜祭文

再致祭 傳教

參班子孫錄名揭板 傳教

皇壇配享錄

皇朝人參享

本朝人參享

皇壇參享時 傳教

本官報營狀

王川書院請額疏

本傳

書事蹟後

殉節錄

追叙二

家乘序

後序三

遺蹟

遺事

京山志

小華外史

海東續小學

海東名將傳

國朝人物考

熱河日記

卷之二

王川書院勅建通文

王川書院上梁文

王川書院奉安文

春秋常享文

忠節祠記

表忠詩

忠節祠題詠

祭墓文

祭廟文

謁廟文二

墓表

墓碣文

墓道碑陰記

豎碑告由文

神道碑銘并序

遺墟碑銘并序

家廟告由文

王川書院重修告由文

還安告由文<sub>四</sub>

移安告由文<sub>三</sub>

王川書院重修記

撤院埋安告由文

旌閭重修上梁文

檜淵書堂通文

晴川書堂通文

道東書院通文

大邱鄉校道通文

忠義齋銘

忠義齋記

忠義齋序

忠義齋上梁文

李義士公忠節錄目錄

李義士公忠節錄卷之一

仁廟朝祭墓 筵教

崇禎紀元後十九年丙戌八月因星州牧使崔有淵辭陞 傳曰李士龍合有褒章之典而事有不如意爾可祭之墓也

顯廟朝錄用子孫 筵奏

崇禎紀元後四十一年戊申十月判中樞府事宋時烈白 上曰星州砲手李士龍以徵兵赴瀋陽臨戰去丸發空砲期不負中國事覺被殺合舉褒典以扶節義 上命李士龍妻舉恤典其子善錄

用

肅廟朝

筵奏

崇禎紀元後六十二年己巳十月丁卯儒臣李玄

逸 啓曰辛巳春間虜人要我師會瀋陽侵 中

朝祖摠兵所守錦州衛星州軍士李士龍者不忍

以砲丸加之天兵連發虛銃虜人覺之以釰擬之

曰汝何敢乃爾士龍曰 天朝是昔日之父母我

者豈可以子而兵其父母乎虜人屢刼之終不屈

遂殺之然虜亦知嘉其義烈送其死于本國夫以

一軍人能知天下之大義此亦不可無褒贈之典

上曰亦令該曹褒贈可也

正廟朝贈職旌閭

傳教

崇禎紀元後三癸丑七月二十七日

傳曰我朝

名將指先屈於忠武而以軍伍名聞天下者亦惟李士龍是已士龍星州人早編戎籍及應敵募赴錦州與天將祖大壽對陣砲之虛發爲虜所覺屢刃之不懾如是者三竟死於敵天將謀知之揭竿特書曰大明忠臣朝鮮義士李士龍嗚乎當辛巳之役若非士龍之一辦將何以有辭於後世乎昔唐衛士殉節朱夫子猶褒章之況以小國之軍伍

爲天朝秉義立謹傑然爲東國之耿光而坐於人微地賤尚闕褒章之典豈樹風迪彝之義星州砲手李士龍特贈星州牧使仍使地方官旌其閭其後孫中可堪祿仕者先卽調用於軍門以聞向於本州牧使諸沫古蹟起感而有旌閭之舉又因李士龍事思之本州曾聞有大明洞之稱者卽壬辰東援中軍施文用之舊墟云文用之父允濟官兵部力贊尚書石公東援之策而文用積勞行間因作我國人宣廟朝授僉樞職先朝贈亞卿且有教略曰俾文用之後勿簪賤役是地又有

是人則今豈可不思一例收錄之方贈參判施文  
用之後裔令道伯招見起送明日卽李提督祠堂  
侑享日也呼燭寫其祭文感激風泉觸類而引伸  
贈誥亦於明日安寶事下該曹

巡營關節到付禮曹關內今七月二十七日

傳曰云云以此傳教該邑良中一體申明知

委爲乎矣到付日時爲先回移宜當事關是齊

節到付備邊司關內今七月二十七日傳曰

云云傳教內辭意奉審施行爲乎矣贈牧

使李士龍宣誥旌閭當自該曹按例舉行事

子孫調用 傳教

崇禎紀元後三乙卯閏二月二十六日 傳曰有

國先務莫過於樹風聲忠愍卓乎忠武凜然而此皆世祿之簪纓固其職分之當然至於贈星州牧使李士龍後孫三人贈兵曹判書忠壯公諸沫後孫尋覓於幾百年之後給料京營俾得肄射沒科者蓋兩人危忠苦節光照宇宙朝家象報之典豈有地處曠感景仰若見伊人今日召試也四武無不褒然高占難誣其食報之理待其唱第李士龍孫一人諸沫孫武兼加設單付餘二人直付一內

贈參判施文用後孫給料勸射亦出於仰體貽贈之聖意亦能浚科唱第後一體直付一內事分付該曹

書院給祭需時禮曹儀啓

崇禎紀元後三丙辰四月初六日到付禮曹關內節啓下教今三月二十六日大臣備局堂上引見入侍時右議政尹著東所啓 贈牧使李士龍書院在星州地故參判安邦俊爲牧使時勅建于其遺墟買置臧穫田土其後故判書吳道一撰記文一道士民莫不感歎其節義而坐於地處尚未

有表章之舉實爲聖朝欠與賜額之恩在所難  
慎分付道臣令本官備給春秋祭需而享之亦足  
爲樹風聲聳觀瞻之道故敢此仰達矣上曰若  
無贈牧使李士龍一人則何以有辭於天下卿言  
甚是矣依爲之事

傳教教是置傳教內辭意奉審該邑良中知  
委施行向事

宣額忠節祠時禮曹儀式

崇禎紀元後三丙辰七月初二日到付禮曹關內  
節啓下教今六月二十四日大臣備局堂上引

見八侍時行禮曹判書閔鍾顯所 啓頃因大臣

筵奏特 命官給祭需於故忠臣李士龍星州書

院以爲樹風聲聳觀瞻之道而伊時亦以若無李

士龍一人則何以有辭於天下有所下 教矣臣

近聞其所勅設者初非書院只是祠宇而扁以忠

烈雖出鄉人之慕義而尚未蒙 賜額之典者恐

爲欠事如武毅公劉克良之地處亦以餒享於崇

節祠則以士龍之忠節卓然屢蒙 聖朝之褒尚

而獨於 宣額一事至今未遑不無銛恨故敢此

仰達矣 上曰大臣之意何如右議政尹著東曰

李士龍忠烈聞于天下 列聖朝褒典備至而祠  
宇與書院有間則 宣額之典允合事宜臣頃以  
官給祭需爲奏 賜額之請未能并陳尚以爲恨  
矣今此禮堂所奏誠好臣何敢有異議乎 上曰  
贈牧使李士龍之忠烈凡有崇報褒章之舉何舉  
可惜雖無劉克良崇節祠之已例當義起爲之且  
於此人何論邦禁有無特爲 宣額宣額日遣方  
伯致祭祭文當親撰矣事

傳教教是置 傳教內辭意奉審施行爲旌  
贈牧使之大義精忠今古一人 列聖朝褒嘉

之教今 聖上崇報之典炳若日星豈有餘憾  
而又於官給祭需之後有此 宣額賜祭之  
命瞻聆所及孰不聳動到關卽時 宣額日字  
推擇回移以爲自本曹草記舉行之地爲旒致  
祭則道臣秋巡時設行事旣有 筵教教是如  
乎 宣額及致祭當在同日則自貴營以秋巡  
早晚前期料量擇吉回移爲旒額號則待受點  
啓下當爲書送計料是在果致祭後 御製祭  
文及前後 筵達舉條并爲精刻揭板于本祠  
而 御製祭文及舉條各爲揭板事亦承 筵

教故茲以移文爲去乎着實舉行之意該邑良  
中申明知委施行向事

同年八月 日本道觀察使臣李泰永奉 教  
謹書

藝文館額號聖 忠烈 忠壯 忠節

落點忠節祠

同年八月十七日己丑 宣額同日 致祭獻

官本道巡察使李泰永大祝本州牧使趙榮慶  
典祀金泉察訪朴忠煥都預差大邱判官洪履  
簡司儀金山郡守李廷書祝史開寧縣監金詰

淳齋郎昌寧縣監洪秉周

餘不盡錄

正廟朝親製賜祭文

維崇禎百六十九年歲次丙辰九月二十三日

國王遣臣玄風縣監李壽咸諭祭于贈牧使李士  
龍之靈豈係地分因人而高維唐衛士紫陽揭襃  
嗟汝特節柱下亦曠蕃漢之戰海櫟相盪汝惟血  
視砲而不凡蕃酋懾睨漢卒叫謹白刃如麻戎毒  
斯逞旂旂逶遲有煌名姓伽倻之野巫陽招招祠  
而侑之山藪溪毛旣廩厥後迺宣華額我詩肆好  
風茲凡百

通政大夫守慶尚道觀察使兼兵馬水軍節度使

巡察使大邱都護府使臣李泰永奉 教謹書

再致祭

傳教

初以丙辰八月十七日致祭而祭文頭辭誤書清國年號

故九月

命再致祭改書

崇

頑紀元後三丙辰九月初四日

傳曰今見該道臣印進星州忠節祠贈星州牧使

李士龍致祭祭文頭辭年號誤書香室舉行萬萬

駭然何異於不祭卽令該房更送香祝於道臣處

以附近守令中曾經承旨人爲獻官地方官爲大

祝設行其時舉行之香室官何足責而名則官員

也至於忠義異於一時八直之官員而近來全不

擇差不知格例八直官員罷職忠義查出汰去如  
渠者何給忠字乎削名渠廳勿齒渠類守僕爲先  
嚴杖卽其地定配不察之該房承旨罷職而道臣  
事亦甚未安越捧三等揭板斯速改書事令內閣  
下諭

參班子孫錄名揭板 傳教

崇禎紀元後三戊午三月初二日 傳曰 皇朝  
人子孫中寧遠伯之後故摠官李源作故前水使  
李孝承遭故其家無着帽之人豈非欠事壯帥御  
將皆是古忠臣之裔寧遠伯後孫中可合祿仕者

按訪草記寧遠伯家不但若此摠兵家前府使李  
宗胤外無職名宗胤如上來令該曹相當職爲先  
作窠卽爲口傳差出使之帽帶參班故忠臣贈牧  
使李士龍後孫前武兼李光臣落仕之代使之按  
訪草記矣其間果已按訪乎問于兵曹如有之今  
日草記觀此京兆書八成丹忠臣諸家祀孫有職  
人中綾原大君奉祀孫前牧使李德鉉在謫金文  
忠奉祀孫前郡守金復根禁錮皆微眚在謫者放  
禁錮人分揀事分付同日兵曹 啓曰前府事李  
宗胤因其身病未得上來云故忠臣李士龍後孫

項因本曹草記

批旨可合祿仕者搜訪報來之

意發關於嶺南道臣今聞故忠臣子孫中出身李

應俊方以一內禁軍隨行出身李應權前仕禁軍

姑未還屬而皆方在京云矣敢啓

傳曰李應俊

應權二人卿其招見其中可合人卽於李光臣代

武兼口傳擬入擬仕者如或時仕一內則前仕者

填其代坐夜一念倍切寤歎今夜享班先以除職

人帽帶八參事亦卽分付於在外班壯御卽覓給

官服使之參班可也同月初三日兵曹啓目內禁

衛一番實差李應俊遷轉本前內禁衛及第李應

權口傳施行何如 啓依允爲旅訓局哨官加設  
啓下待窠陞資此後自本曹亦必收用爲旅禁軍  
一窠必以故牧使家人長爲填差而除取才給官  
馬非徒配以下之罪勿汰無論支嫡一名與出身  
閒良其家人年過十五歲以上者必皆錄名於本  
曹仍又載錄於御覽禁軍官案及八啓來歷案以  
爲永久遵守之地一件禁軍廳揭板一件星州政  
堂揭板事分付爲良如教

同年李春資憲大夫兵曹判書兼知 經筵事臣

李時秀奉

教謹書

皇壇配享錄

用三皇帝忌日祭之

太祖高皇帝戊寅閏五月十日

若閏五月則以閏五月舉行事

配享武靈王徐達

神宗顯皇帝庚戌七月二十一日

配享寧遠伯李如松

毅宗烈皇帝甲申三月十九日

配享文貞公范景文

皇朝人參享

摠兵李如梅

丁酉天將已未孫成龍脫身東來子孫在鄉

提督麻貴

丁酉東征孫舜裳督糧登舟漂到本國子孫在鄉

池河守備黃功自瀋陽陪駕京

庠生王文祥自瀋陽陪駕京

按察使王楫自瀋陽陪駕京鄉東

庠生馮三仕自瀋陽陪駕京

庠生裴三生自瀋陽陪駕京

吏部左侍郎鄭文謙自瀋陽陪駕京

宗人府義賓陳鳳儀自瀋陽陪駕無

贈參議康世爵自檄島東來

吏部尚書胡士表自檄島東來

兵部尚書田應揚孫好謙自檄島

贈參判施文用

子孫在西東征

庠生揚福吉

自瀋陽陪駕  
東來子孫無

星山伯楚海昌

子孫在鄉

花山君千萬里

子孫在京鄉在

通政潘騰雲

子孫在京鄉在

水使宣若海

辛未使入瀋陽以片言  
折服強胡子孫在鄉

兵部郎中賈維鏞

子孫在鄉

贈參判宣世綱

丙子到雙巖戰  
子孫在鄉

吏部尚書史

繇子孫在京

經理使萬世德

子孫在京

兵部尚書石星子孫在鄉

都督董一元子孫在鄉

摠節使片碣頌子孫在京鄉在

參將駱尚志子孫在鄉

都督楊元子孫在鄉

完山君秋水鏡子孫在鄉

本朝人參享

忠武公李舜臣壬辰露梁之役殉節

忠武公金應河已未溪河之役力戰死

忠毅公李有吉已未溪河之役力戰死

贈參判金

雲

已未溪河之役力戰死

忠壯公南以興

丁卯安州自焚死

壯烈公李希建

丁卯赴安州戰亡

忠愍公宋圖南

丁卯赴安州戰亡

忠毅公崔夢亮

丁卯赴安州戰亡

文忠公金尚容

丁丑江都自焚死

忠肅公李尚吉

丁丑江都自劉死

毅烈公洪命亨

丁丑江都自焚死

忠穆公李時稷

丁丑江都自劉死

忠憲公尹

烜

丁丑江都罵賊遇害

忠顯公李惇五

丁丑江都遇賊不屈死

忠顯公宋時榮

丁丑江都自刎死

忠烈公權順長

丁丑江都自焚死

忠正公金益兼

丁丑江都自焚死

忠愍公李惇叙

丁丑江都遇賊投水死

忠愍公閔

埜

丁丑江都自刎死

贈參議黃善身

丁丑江都力戰死

贈參議具元一

丁丑江都力戰死

贈參議姜興業

丁丑江都力戰死

贈參議李士圭

丁丑江都冒賊死

忠肅公趙廷翼

丁丑江都被虜投壑死

忠烈公洪命耆

丁丑勸王至金化縣遇賊戰死

忠壯公李義培

丁丑到雙嶺戰死

忠壯公許完

丁丑到雙嶺自刎死

忠壯公閔球

丁丑到雙嶺戰死

忠愍公金弘翼

丙子廣州戰亡

贈參尹申誠立

丙子南漢戰亡

忠烈公祥原君世寧

丁丑江都自焚死

愍肅公金瑄

丁丑抗賊遇害

贈牧使李士龍

辛巳錦州之役抗義不屈遇害

忠烈公黃一皓

辛巳遇害

忠壯公崔孝一

丙子謀攻瀋陽  
事泄不食死

贈參議張俊健

辛巳遇害

贈參議車禮亮

己卯謀攻瀋陽  
事泄被囚死

忠貞公尹

集

丁丑瀋陽遇害

忠烈公吳達濟

丁丑瀋陽遇害

忠正公洪翼漢

丁丑瀋陽遇害

贈參判金得男

丁丑到富平  
遇賊戰死

忠景公鄭百亨

丁丑江都殉節

文正公金尚憲

丁丑裂和書  
被拘瀋陽不屈

文簡公鄭

蘊

丁丑下城時  
刺腹不死

文正公尹

煌

丙子  
斥和

貞孝公綾原大君輔

丁丑南漢出城  
時涕泣諫止

文忠公曹漢英

辛巳被係  
瀋陽不屈

忠正公金德誠

丙子  
斥和

忠正公李

榮

丙子  
斥和

貞僖公任有後

丙子  
斥和

忠簡公俞

梲

丙子  
斥和

忠景公金壽翼

丙子  
斥和

贈副提學蔡聖龜

丁丑  
斥和

贈參議李緯國

丁丑  
斥和

贈判書李命雄

丙子  
斥和

襄武公鄭鳳壽

丁卯  
督戰龍骨城  
獻賊

忠愍公林慶業

壬午  
執不屈被

文正公宋時烈

密  
孝廟朝赴召  
贊北伐大計

贈判書申

曩

丙子  
身不仕後潔

忠壯公李

忼

丁丑  
斥和

贈左贊成鄭雷卿

已卯  
遇害

忠烈公羅德憲

丙子  
禮不屈抗

襄毅公金景瑞

已未  
不屈死罵賊

武肅公朴震英

丙子殉節

皇壇參享時

傳教

傳曰晴則多多爭赴雨則占便不來至于今番參班而駭然甚矣朝官儒武捧舉案不過百餘人云揆以人情寧有是乎若念乃先之心雨暘何擇設或有在外不參者今朔節享有望拜禮則其敢息偃在鄉廬乎今日不爲參班儒武一幷限今秋科前停舉朝官拿處外任及衆所共知實病各其門長呈單于京兆則該房考察取舍渠輩何論不飭之罪門長焉敢免乎查出各家門長先從有職施

以令該府拿勘之典俾知慨我寤歎於下泉匪風之患此後則令京兆長問于各家門長捧單可以參班人合錄一冊一件八啓一件置于該房一件置于京兆一以除紛淆一以定成式每於三月請出修整莫曰此舉近於不意人之爲人惟孝與忠如輪翼之不可偏廢而習俗日渝義理日晦倫綱日斁今日之教正爲三者之弊有激而發也諸忠家後孫勿以此教爲迂益思追先之道先自奔走於筋力之事莫或怠弛則八是墳行是禮之時其心當專尊周亦可爲追先之一端又能擴充滋長

常常不已則月計歲計當真箇盡分於尊周之人  
豈不盛哉皆令知悉

本官報營狀

牧使李衡祥

為牒報事崇獎節義所不可一刻緩忽本州義士  
李士龍捐軀於萬里外燕塞扶植乎三百年綱常  
當初五道監司護喪自上特命其後立石致祭  
又出朝議激勸之道在所不已其妻李氏年今  
九十五歲其子善其不能供養自本官亦為隨便  
救助為乎矣事關風教如是牒報為乎玆同碑文  
都付上使道以各別參商某樣穀物中優給食物

一以活垂死之命一以警頽俗之地如何

玉川書院請額疏

承旨裴正徽

伏以旌德禮賢化道之所先也崇表守節聖哲之  
急務也故其所以酬忠褒節樹風聲而扶名教者  
至此而無以加焉至於本州故義士李士龍則尤  
有所卓異者以出身之子名隸御營旗總卑微之  
甚而忠義之心根於天性當辛巳錦州之役亦在  
遣中而臨行慷慨奮發不食官犒以死自誓托妻  
子以善養老母及到而接戰也每發虛砲同類恐  
爲所覺勸匿其丸乃曰匿丸雖可免死而吾之素

心無以自白於天日之下竟不匿其丸果見覺而  
被詰則答曰我國於 皇明義則君臣恩猶父子  
詎可發砲而害其人乎鉛丸俱在何敢匿乎出諸  
囊中而示之我國人在行者同聲聚訴請貸其命  
而使自效則奮然曰吾意已決惟願速死若輩徒  
困我耳辭氣益厲不少撓屈終至於見殺而猶使  
之歎服歸屍於我軍而返葬於本土嗚乎烈哉臣  
等歷觀前古之人衣君食君澤厚恩深服儒冠儒  
談道說義亦或親密於君有若家人父子而及至  
危難之際其能辦熊魚取舍之分者甚尠今此李

士龍則未嘗沾一命之恩讀一卷之書而生此海外之偏邦於此而有萬不獲已之起送於彼而有百端誘脅之威迫雖使勉從亦無可罪而特其賦性之忠義由中而激發凜乎其不可犯確乎其不可拔而視死如歸甘死如飴至使威脅而戕害者亦嘉其義節而裹屍還送不棄置於沙場其貞忠大節誠千古所罕覩吾人之所以存諸膏臆而不能發諸事爲者賴是而小有纍白使我東方永有辭於天下後世此士論之所倚重而歸仰者也本州北面王川邊鵲村里乃士龍舊居環一里一草

一木皆令人聳動而感發曾在十餘年前一邑之  
人營建祠宇自儒士武夫下至閭閻皂隸之賤共  
黷是舉激厲奮起毫聚縷集收合財力子來赴役  
不日就畢乃使忠魂毅魄不至泯滅於來後則亦  
可見秉彝之性極天而罔墜也臣等竊伏聞 仁  
祖大王面諭本州牧使崔有淵使祭其墓 顯宗  
大王用繡衣御史南九萬言官其子善賜其妻米  
十石 列聖褒嘉之典吁亦盛矣今此立廟餼食  
實出於輿情慕仰之誠心而至其表異而崇獎之  
聳動而激厲之實係於 國家恩額之寵錫此臣

等所以封疏陳請而亦豈非  殿下繼志述事之一件節目乎或有以李士龍名位卑微爲疑者此則甚有所不然者酬忠褒節豈以貴賤有間乎臣等謹按南宋建炎初紹興守臣李黼降虜與虜酋并馬出有一衛士姓唐者赴駕不及尚畱紹興見之以一大方磚逐打其酋幾中因被害死之其後立廟其所宣賜旌忠額朱子爲其守時夏爲大其廟又說與汪尚書令崇奉之事見朱子語類今李士龍名編御營則卽古衛士而若其遭遇之時不同樹立之節尤高則必有可言者矣宋朝衛士之

廟亦有宣額之恩典則前代已行之事可考而知也臣等聞風興起激厲感發百舍重繭千里來謁伏願 殿下深嘉希世之節義俯察由衷之情願特 賜華扁之額以施表章之典則庶將拭目吐氣鼓舞觀感以仰副 國家崇褒之盛意臣等無任瞻天望聖激切祈懇之至

本傳

尤菴宋時烈

李士龍星州人以砲手隸兵籍 崇禎庚辰清虜西犯 皇明嚇索我賦自訓局別送精銳士龍與焉初至州默然逢點及行州牧親犒以送之酒食

甚設士龍不食乃言曰聞以我等助虜攻 皇帝  
國我何忍食此我心已有所定矣仍自庭下直上  
州牧坐或偃仰或箕踞州牧任之不呵既至錦州  
衛松山舖虜與天將祖大壽對陣交戰虜愛惜我  
兵之技精庇在馬鞍下以防矢石有發砲而中者  
則輒有重賞士龍初放砲不丸虛發虜覺之摔出  
擬刃於頸士龍不爲動虜釋之而曰復敢如是耶  
汝若放而中者卽有重賚士龍復如是虜甚怒而  
猶不殺至於三則虜遂亂斫以徇之俄而祖將謀  
知之揭示一大旗大書曰大明忠臣朝鮮義士李

士龍虜亦義之兵罷許同仇收屍以歸歸葬星州  
鵲村里其妻全節不嫁有一子曰善其時州牧乃  
故參議閔公光勲也當士龍偃仰箕踞也老峰兄  
弟幼從傍告之曰彼漢無禮何不治之公曰是何  
言也聞其言我不勝愧屈矣其後老峰爲學士嘗  
至懷德之興龍溪舍夜坐說此事因相對流涕矣  
其後滄江趙丈涑來過鎮岑之舟村余再往拜焉  
仍語及之趙丈曰余亦略聞之矣蓋爲傳以記之  
余曰閔學士之意亦然矣 崇禎戊申余自溫宮  
隨 駕入京嘗於 筵席進曰袁世尤當崇獎節

義仍及嚴興道姜孝元及士龍事

顯廟卽命除

李善職善卽爲萬戶姜孝元則

命以內豎奴二

名代贖其子與孫嚴興道

命訪其子孫而錄用

之嗚乎

聖朝舉措可謂善美矣謹按詩曰天生

烝民有物有則民之秉彝好是懿德夫士龍一賤

卒也未必聞聖賢之言讀詩書之訓者只是民彝

物則得於天而根於心知皇上之可尊親戎虜之

爲犬羊自識其向背而至於殺身而不悔觀於此

而益信大雅之訓不我欺也今夫爲士者平居讀

經史談義理視士龍孝元等無異虫獸之蠢然矣

及其遇事變臨利害則蒼黃動惑去義失身覲然無恥者滔滔也其視士龍等爲如何哉吾以是表以出之實朱夫子表章唐衛士之遺意也嚴興道其事載野語姜孝元略見老峰所書墓石云

書事蹟後

葛菴李玄逸

人固有委致其命不愛其死者然所死亦非一端或激於義理焉而死或迫於事勢焉而死或惡狠忿懟焉而死或悲憤傷悼焉而死或要名譽爲任俠不負然諾焉而死此亦有所長非苟而已也雖然率多出於一時意氣感奮之餘而或不免有所

爲而爲之若李義士錦州之死眞所謂出於人心之固有無所爲而爲之者也 崇禎庚辰清虜索賦於我爲犯順之計當是時所送徒數千人義士與焉遂慷慨憤激以死自誓不食犒饋辭設二親勉其婦以善養老母旣到虜驅策我軍居前行使之向前發砲凡義士粧藥不粧凡連發虛銃同隊之人爲義士懼戒令匿凡隱其跡義士憤然曰吾已受死何隱爲故欲令彼知之以暴吾心願勿復言俄爲虜所覺卽牽去將斬之且詰且責義士慨然曰 大明之於我國父母也焉有爲之子而賊

害其親者乎吾有死而已不忍爲此也虜必欲強  
劫之舉釁擬之者數義士終不屈遂斬以威衆然  
虜亦義公之爲送其屍以歸後有人刻大字於山  
海關城頭石曰朝鮮李義士五誘七脅終不放一  
丸而死蓋亦嘉其義烈云嗚乎義士行伍中人初  
無策名委質之事又未嘗習於詩書禮義之訓直  
執父前驅爲人役而已設使隨羣逐隊無所建立  
全軀命而歸必無後咎餘責貽譏取笑之慮而乃  
獨誓心天地一定不易致命遂志不少惡悔若非  
忠義之性鬱於中而作於外不爲私情邪念之所

回奪何以及此其視慕義之徒一朝倉卒發憤薙  
以死者不旣賢矣乎益驗夫天性民彝之在世有  
明晦而在人無存亡也昔宋之南渡也虜至紹興  
府守臣李黼降之及虜再來有一衛士姓唐者畱  
在紹興見黼與虜酋并馬而出遂取一大方磚逐  
打其酋幾中因被害死之紹興人爲立廟其所至  
賜旌忠額朱子在紹興時更爲大其廟旣又說與  
汪尚書令崇奉之夫以大君子權度之正其於報  
祀之典尤宜慎重而乃爲一衛士之微反復致意  
惓惓不忘者豈不爲其羞惡之本心發於秉彝之

良性不能自己而視死如歸故歟今以義士所樹  
立視唐之爲不必較其優劣然竊意其扶人紀明  
大義之功殆有過焉者 國家之愬勲褒錄以爲  
人臣忠義之勸士林之尊崇報事以爲興起良心  
之助者夫豈偶然哉其亦暗合乎朱夫子當日之  
旨矣余自後生時固嘗聞義士之風聲心竊歎奇  
之者久矣頃日在朝嘗達之 經筵請 贈職褒

寵之事下該曹未及施行罪逐來星山上舍生裴  
君益徽見訪於晞陽瘴海之濱因辱示以吳李兩  
學士碑文若祠記請余識其後余惟義士之高風

勁節固已載之當世秉筆者纂述中將傳示久遠  
不必更著佛頭之糞然特其所以死出於人心之  
固有儻然一無所爲故臨命之際從容靜暇清峻  
壯烈了無一毫苟難爲人之意此則不可不使後  
之人有知焉因書碑記之後以歸之

殉節錄

進士崔 麟

義士諱士龍姓李 有明朝鮮國星州府砲手也  
辛巳春清人召我國砲兵助攻中朝 朝廷以柳  
琳柳廷翼爲領將以前府使朴綱等爲軍官發五  
千兵赴之公以砲兵編伍將發謂其同伍曰吾以

王命雖不敢逃而不忍與天兵相戰同伍曰苟  
害吾身何暇恤彼莫如善鬪生還公瞋目不應及  
進攻松山天兵被圍兩朔糧竭樵絕採草根於城  
外以代薪者多爲我軍火砲所斃城中有解鮮語  
者登城呼曰爾朝鮮忍負萬曆皇帝壬辰東征  
之恩耶城中不食月餘採得草根苟延數日之命  
而爾等必欲盡殺何也時明人掛榜募獻清兵首  
級者賞五十金獻鮮兵首級者賞一百五十金清  
人攻城益急使眞捷一人分配我軍一人督視放  
砲我軍旣被清人脅制又饗其賞賜務益殫巧天

兵被丸而斃者益衆公獨連放虛砲不中一丸撻  
子分配者怒詰之曰爾獨何故不放丸公曰大  
明我父母邦吾何忍殺大明人也會曰爾邦今  
已臣妾於我我是汝父母邦何其目南朝爲汝  
父母邦也公大呼曰我國壬辰島人之變大明  
天子動天下之兵連營萬里極賜拯濟我君臣父  
子草木禽獸保有今日者莫非大明之德其何  
忍負吾心已定速殺速殺更無一言清人愈怒使  
我軍領將柳琳斬之及其返軍也同伍裹屍以歸  
嗚乎若義士者方可謂烈丈夫耳

# 追叙

主簿李野淳

余偶見李活齋爲李義士立傳頗詳然尚恨有爽實者其曰失火藥云者是果近似於義士口氣乎當初清人索我國能於火砲者爲犯順之計其所送之徒五千人義士與焉已慷慨激憤以死自誓以犒餉之盛也而不啗一嚙設婦子而勉焉者善養二親及到錦州囊其金丸每發輒虛放爲清人所覺將斬之義士曰大明於我國父母也焉有子而賊其親者乎今之來是君命不可避也其不忍害是彝性不可奪也卽斬之而然且義之送

其屍刻大字於山海關城頭石曰朝鮮李義士五  
誘七脅終不放一丸而死嗚乎此非一朝倉卒發  
憤邁以死者比非賢遠於人乎今活齋則曰虜怒  
士龍之不放一丸詰其由士龍諉以中道顛仆散  
失火藥云云誠如是也此特苟且彌縫之語而殆  
近於畏死乞憐之跡曾謂義士之磊落光明而有  
是哉且散失火藥之云使一孺子聽之必不信虜  
雖頑蠢亦人爾其非可欺之方亦明矣方以不愛  
其肉不畏其刃底揭揭烈烈之氣又何苦而吐此  
頽孱之口乎雖至愚者不肯爲而謂義士之賢而

爲之耶以愚所聞虜驅策我軍居前行發砲丸義士之發虛銳可易見也同隊之人爲義士懼戒令匿凡而隱其跡義士瞋目而曰吾已淩死矣何以隱爲故欲令彼知之以暴吾心勿復言俄而被牽去斬之其臨斬仍舉大明父母之說又曰鉛丸皆在囊中豈可隱諸出而示之蓋正大高特卽其本心乃反諉於中道之失而自掩其跡耶捐軀於萬里外燕塞扶植乎三百年綱常非特朝鮮義士實天下義士也又於其將斬之際我軍請貸其死使自效虜亦義而許之義士顧謂曰若輩胡困我

爲吾志已定不如死之爲榮竟不屈而死其屍之  
歸也 朝家命五道監司護喪苟如活齋之云則  
其死卻黝昧矣城頭之刻胡如彼嘉其義烈 朝  
家之特典亦何至於是乎活齋凡論古今人物其  
叙述文法精着刻緊而獨此一段恐或爲義士風  
節之累豈當時激慨之筆偶出於傳聞之誤者歟

追叙

進士都禹璟

李義士公天性孝謹自幼聞于州里辛巳錦州之  
役清人索我賦義士年四十六以勇略應募調遣  
臨發顧謂妻李氏曰吾不復返矣善養老母慷慨

不食官犒至軍發空砲同仇止之曰事露必死胡  
不匿其丸義士曰子皆匿之吾何匿爲虜果覺之  
怒詰之義士曰皇朝之於我國義是君臣恩猶  
父子神宗皇帝之德我國萬世難忘今教子殺  
父人孰肯之鉛丸俱在因出示之清人以刃脅之  
義士大呼曰直今死耳復何問焉衆皆聚訢曰盍  
貸其命使復自效清將欲許之義士復大笑顧衆  
人曰吾意已定若輩之請無益徒困我爾清人知  
其終不可奪遂害之然猶義之收其屍屬諸昭  
顯世子質館世子爲之棺斂送之東還仁祖

大王爲之驚悼下

教曰李士龍烈士也豈無褒

寵之典命道臣皆護送而禮葬之復命本州牧使  
崔有淵祭其墓其後人有見山海關城頭石大刻  
朝鮮義士李士龍五誘七脅終不放一丸而死嗚  
乎神州陸沉節士遁匿竊惟 皇朝志士孰能爲  
義士立言者乎刻之城頭石必虜酋蠻卒亦義而  
壯之者耶此秉彝之攸同昔人所謂精忠華夷見  
氣節天地知一句是也 顯廟壬寅用繡衣南九  
萬言官其子善爲漆浦萬戶州人又立祠而祭之  
正廟朝以忠節額其祠焉

家乘序

判書李源祚

卒伍而死於國千古惟唐衛士一人而已死於國  
猶難况死於天下乎當是時而死者上而學士大  
夫下則長平之坑耳義士公屬國一砲手而五誘  
七脅終不撓以死義士果何人哉噫虜焰熨天愛  
我兵而肘腋之發一丸則賞千金乃一不丸而誘  
之再不丸而脅之三不丸而竟死之公之死不死  
於臨陣之日而死於官庭箕踞之時死若是容易  
而惟心之所欲爲哉唐衛士目見逆臣之造變君  
上之玷危翻然勃然之間一死可辦而義士之死

藏凜烈於隱忍判直截於從容尤豈不難乎難哉  
魯仲連不過蹈海一言而稱天下士若義士其真  
天下士歟天下而有山海城頭之刻國而有列  
聖朝恩教若史若傳若祠記墓碑已赫晰于世豈  
安用家乘爲也然後承而欲著存焉則裒粹爲一  
帛書亦禮之所許也其孫奎豐蒼城請余撰次之  
余不辭而略櫟括焉

後序

承旨李義峻

在昔壬辰島人之倡蹶也  
鑾輿播遷億兆蒼生  
肝腦塗地在東土頂天立地凡有血氣之類誓不

共戴天之讐也何幸 萬曆皇帝命之以援師國  
以得全民以獲安伊誰之力繫誰之恩若使無東  
顧之事卽有君臣之大義也况又有深恩厚澤於  
我者乎噫天地閉塞冠裳顛倒中華禮樂文物之  
盛舉將淪滅是以我邦有金文正鄭桐溪三學士  
諸賢斥和殉義其貞忠大節爲天下嚮慕者也念  
昔日受恩 皇朝則而我國倘舉一國之人報仇  
之不暇而忍助兵而攻 皇師耶嗚乎庚辰辛巳  
錦州之役不幸使我師貽羞於天下則公之一死  
可謂昏衢之日月頽波之砥柱其生也稟純剛至

正之氣秉執卓然臨行不食官牒溫嶠之枕戈素有蓄也托妻子以善養父母其孝其忠根於天性移孝爲忠不可誣也語其分則位不過執戟而及對皇陣恐傷天兵去丸發砲不怵乎白刃如麻萬鎗齊鳴戎毒斯逞而以若鐵心石腸乃知一區皇明之可尊不知有他萬乘之可畏三發空砲五誘七脅終不放一丸爲敵所詰乃對曰大明之於我國義君臣恩父子也若砲我天朝之人則是子弑父臣弑君也吾何忍爲且曰一天之下豈有二天子乎烈烈哉若非直氣橫亘宇宙詎有

二天子之叱發諸口耶竟爲敵亂斫而死扶倫常  
於萬世眞吳學士之所言萃乎泰山不足爲高昭  
乎日月不足爲明者乎虜之害之者渠之不獲已  
也高其節而義之嘖嘖不已使之收屍托於昭  
顯世子以其屍備禮送之本國蓋秉彝之性華夷  
無殊也以此之由天將謀知之揭竿特書以大明  
忠臣朝鮮義士八字道路增彩天下舉踵而歎詩  
云樂只君子爲國之光其斯之謂乎迨惟神宗  
皇上之大恩迄于今三百年而未亾矣予於平常  
未嘗一日忘諸心而歔歔長歎然一部春秋何地

可讀乎顧念公之一辦大義老峰先生之淚西坡  
學士之涕豈徒然哉公軍伍也至於聖教有曰  
豈係地分因人而高侑之祠之贈以職而恤其  
後名垂百世而不朽也夫余生晚世不得與大老  
立傳之時贊一辭執毫嚶嚶而歎

後序

持平李基普

余在李公之鄉自少聞公之風竊悲其苦節爲能  
辦一死於天下而未詳其殉節本末今上丙辰  
特命宣額遣道臣致祭余時任其院始徧求所  
爲公錄者蓋嘗有若華陽大老立其傳蟾村先生

表其碑西坡吳公記其事是皆君子之信筆而公之實蹟也雖然其碑若記皆本於傳文而傳文則尤翁之所親聽於老峰老峰之所目見其調遣時光景則傳文尤詳而信矣余讀一過不覺髮豎涕泗忽忽若立於蕃漢對陣之中身染其片片斫血此曷故焉余亦有公所秉之彝而徒嚶嚶於曠世之後乎昔人有言曰慷慨殺身易從容就死難余嘗竊意公臨陣慷慨見覺虛砲而倉卒殺死及覩傳文然後始信其所立尤難焉蓋公卒伍也名編兵籍赴難絕域則顧其何有於匹夫身名而況其

爺孃妻子摻手號設臨其行宜其志只有死生一念而遑恤其餘哉府庭逢點必不默然西垣盛饋與衆同餽而顧乃卻犒箕踞愧屈州牧斷斷一死已有素定行到錦州果匝一歲不變此心此所謂從容沒死而最後之虛砲被斫適以成其去時心耳顧其死不其難乎茲故尤翁記其初赴難事甚詳而末又曰實朱子表章唐衛士之意也嗚乎有如公之大節得如尤翁之立傳而愈久不泯則今聖上所以御製之文聖朝褒忠之典靡有餘憾而公之撐天之節至此愈光矣今公之實錄安

敢一字贅剩本孫應俊謀輯散逸作爲一冊要余置數行故竊以所嘗感者遂爲之言

後序

進士李禹世

事蹟何爲而錄也所以錄公之忠節也夫從古以忠節稱者鮮矣而間千百代往往有之若殷之孤竹子周之魯仲連漢之蘇中郎唐之顏杲卿宋之文天祥諸賢是已噫天地大矣古今遠矣而以忠節表者若是其罕焉則況於海外偏邦而尤豈易其人哉獨至我聖朝重熙累洽培養扶植以砥礪名節豎立卓爾之賢相望於史牒不可殫記而

若斥和三學士金文正諸賢尤是挽近忠節之  
炳然昭著也於乎此猶士大夫之賢讀書明理素  
講君臣之義以斯人辦斯節亦謂次第事而至若  
本州義士李公海外偏邦名編卒伍之賤而躬蹈  
白刃視死如歸以眇然七尺之身辦千古尊攘之  
大義使我國君民永有辭於天下後世其視夷齊  
魯蘇顏文諸賢小無歉焉而直與三學士金文正  
同軌而并躅吁亦烈哉然而自古至今若無大人  
君子爲之表章而崇美之則又安使如彼之卓卓  
忠節垂諸竹帛而不朽建諸天地而無窮至今昭

人耳目若躬覩而親聞也哉所以大明忠臣朝鮮  
義士八字題目 明將書之于旗清人刻之于石  
尤庵夫子爲之立傳蟾村閔公爲之題墓西坡吳  
公之所撰記輿地之所載錄而星之父老爲建俎  
豆之享於公之遺墟者也且 列聖朝褒獎特異  
而至于我 聖上尤致意焉旣 親製文遣道臣  
而祭之宣以忠節之祠額何其盛哉公之忠節至  
于是尤有光而無餘憾矣余時猥忝院任記其顛  
末以備後之君子考覽焉

遺蹟

判書許 傳

李士龍星州人也 崇禎十四年我國將李時英率兵五千入錦州清人劫時英爲前行與明都督祖大壽戰於松山下士龍獨砲不入丸欲以明本心清人覺之斬士龍以風時英軍今星州有忠節祠士龍俎豆之所

遺事

李義士公諱士龍字仕中貫星山遠祖諱能一高麗開國勳星山伯八 本朝諱汝信文郡守累傳至諱孟山號志新亭有諱舜年武萬戶於公爲五世祖曰駟曰秀良曰有文公之高曾祖及祖也考

諱廷建 贈司僕妣令人居昌劉氏以 昭敬大  
王乙未生自幼孝於親有勇略焉 崇禎九年丙  
子我 仁祖大王十四年也運遭陽九清虜以我  
朝議斬使之釁突圍南漢竟至 主辱鄭文簡  
之剝腹三學士之被執其他有炳烺忠節者亦不  
可盡記粵四年庚辰虜方入寇 皇朝請兵五千  
于我邦將以共伐 天朝也朝廷不得已募兵應  
之時公之年四十餘以武勇見拔臨行以善養老  
母托其妻李氏詣郡辭犒其甯中已辦得一箇熊  
魚之別見者咸歎其言之忠直有慚色及辛巳錦

州之役對 天將祖大壽陣發虛礮虜覺之五誘  
七脅猶不屈曰 皇明之於我國君臣之義已定  
有父母之恩豈敢背乎遂遇害是年四月十日也  
享年四十七祖將揭竿書大明忠臣朝鮮義士虜  
亦義之許收屍使返櫬 仁考命五道方伯禮葬  
于本州望星坊鵲村寅坐之原因 命州牧崔有  
淵爲文祭奠清人之立石山海關胡學士之刻詩  
松山亦表忠之一事 顯廟戊申尤庵宋文正公  
筵奏官其子善萬戶戊寅御史南九萬 啓官  
其子廩其妻 肅廟壬申牧使安邦俊立祠于遺

墟院號王川葛庵李文敬公 筵奏褒忠之事

正考癸丑 王若曰辛巳錦州之役若非李士龍  
一人則何以有辭於天下後世乎 贈通訓大夫

星州牧使因 命綽楔之曲丙辰八月日 賜額

忠節祠 特下御製祭文致祭 命該道臣舉行

時祭文頭辭不書 崇禎年號及斟酒奠酌之地

卒然齏黏不得舉有司惧而退以不利餒享具由

奏聞 上震怒查室官卽為罷黜該道臣特施

嚴教守僕卽為嚴杖夏卜九月日 命官致祭

特傳教揭板于禁軍廳及星州政堂嗚乎盛哉余

於蓋黏之異竊有惑焉然朱先生曰人死衆人之  
魂氣如雲消霧散忠臣烈士之靈魂凝結不滅今  
於義士公事自有大驗矣忠魂毅魄千秋萬世  
豈無昭昭明鑑於尊攘之義耶戊午 皇壇 親  
享之日有子孫參班之教煌煌 綸綍比歲疊稠  
孰不感涕於聖恩乎公之子孫世居州之南鳳山  
村 哲廟甲寅移建祠廟及旌閭 上皇丙辰撰  
忠義齋于祠廟旁移揭其政堂揭板將豎神道碑  
而營刊忠節鐸此其實蹟顛趾大略也配 贈淑  
夫人完山李氏子男善萬戶孫男元發元碩元儀

餘不錄嗚乎公以偏邦一礮卒明大義於天下扶  
綱常於萬古俯仰乎穹隕之間無所爲而爲之者  
惟公一人而已生而去丸之義廟而盞黍之靈何  
其壯也何其異哉 列聖朝褒美之典靡不燦備  
然 贈其爵而只止郡綬官其子而亦止萬戶往  
在庚午以邦禁撤院今無一間架尸祝之奉亦未  
蒙易名之典蓋以堂堂忠義卓爾名節天之報施  
於公者不能無憾於天下後世云爾清州鄭恩錫  
謹撰

京山誌

判書李元禎

李士龍出身廷建之子非乎石鵲村里人也辛巳  
錦州之役清人徵火炮於我國士龍將行與其父  
母設曰吾今行必死死而得正愈於苟活須勿以  
爲悲及至軍以所受鉛丸藏之囊中每發虛砲同  
類恐爲清人所覺勸匿其丸士龍曰匿之雖可以  
免死我之素心無以自白於天日之下竟不匿果  
見覺於清人縛致於前而詰之答曰我國父事  
大明受萬曆皇帝罔極之恩此吾所以不忍發  
一砲殺一人者也鉛丸俱在何敢隱乎因出諸囊  
中而示之命斬之我兵聚訴請貸其生使自

效清人亦嘉其義而許之士龍顧謂聚斂諸軍曰  
吾意已決惟願速死若輩之訢適足以困我也累  
加誘脅竟不屈被斬時昭顯世子在軍中爲質  
清人以其屍托於世子送之本國世子爲之  
斂棺飭沿路輦運返葬於本州時牧使崔有淵方  
辭朝仁祖大王引見下教曰李士龍合有褒  
章之典而事有不如意者爾可祭之墓也崔有淵  
至州與鄉人李綸等爲文以祭之顯宗戊申因  
宋時烈啓達官其子善爲漆浦萬戶其妻賜米  
十石

小華外史

參判吳顯相

李士龍星州人武出身廷建子也以勇力膽略聞  
於鄉 崇禎十四年辛巳虜酋脅徵我精砲五千  
赴錦州本州聞士龍名編八軍書且犒勞之士龍  
卻不食曰以我助虜攻父母國安用犒爲將行辭  
父母曰兒今去必死死而得正不猶愈於苟活勿  
以兒死悲憾也顧妻孥曰吾死不旋踵須善養吾  
父母及至軍與祖大壽對壘而戰士龍去丸而發  
砲天兵無所傷虜覺之誘之以賞脅之以死至於  
三而終不動曰 天朝於我義君臣而恩父子辭

氣益慷慨竟爲虜所殺祖大壽聞之大書於旗曰  
大明忠臣朝鮮義士李士龍虜亦望見勒歸其屍  
昭顯世子爲之棺斂令返葬 顯廟戊申錄公  
子善爲萬戶 正廟癸丑贈星州牧使旌其閭賜  
祠額忠節

海東續小學

進士朴在馨

李士龍星州人以良丁隸兵籍 崇禎庚辰清兵  
西犯 皇明嚇索我助自訓局別送精銳士龍與  
焉初至州默然逢點及行州牧親犒以送之酒食  
士龍不食曰聞以我等助虜攻 皇帝國我何忍

會此仍自庭下直上州牧座或偃仰或箕踞州牧任之不呵既至錦州衛松山舖虜與天將祖大壽對陣交戰虜愛我兵之技精庇在馬鞍下以避矢石有發砲而中者則輒有重賞士龍初放不丸虛發虜擬刃於頸士龍不動虜釋之曰復不敢如是也汝若放而中則有重賞士龍復如是虜甚怒而猶不殺至於三則虜遂亂斫而殉之俄而祖將謀知之揭示一大旗大書曰朝鮮義士李士龍虜亦義之兵罷許同行收屍以歸

海東名將傳

大提學洪良浩

李士龍星州人

崇禎庚辰清人西犯脅我徵兵

士龍與焉至錦州衛松山舖清人與天將祖大壽對陣清人惜我人之技精俾伏馬障內以防矢石而有發砲而中者則重賞士龍初放無丸清人覺之猝出擬刃於頸士龍少不色動清人釋而囑曰復敢如此必死如中之吾其厚賚士龍連三虛發清人大怒亂斫而殉之祖將謀知之揭示一大旗大書朝鮮國義士李士龍八字清人亦義之戰罷許令收屍歸葬故國是時清人徵兵非一戊寅李時英庚辰林慶業辛巳柳琳并爲上將一國精砲

盡入於助敵犯順而皆去凡與鏃華人至今稱朝鮮之義士

國朝人物考

安鍾和

李士龍星州人庚辰錦州之役以砲手從軍臨行顧謂妻李氏曰吾不復返矣善事吾兩親也至清陣與明人交戰士龍輒發空砲同儕止之曰事露必死等死寧匿其丸士龍曰我欲明白死何匿爲清人果覺之怒詰責士龍毅然曰明神宗皇帝之德萬世不可忘也我豈忍砲向乎清將刃脅之大呼不屈我兵之在行者皆聚訢請貸其死使自

效清人許之士龍曰吾意已决若輩之請無益徒困我耳清人知其不可誘遂殺之方士龍之就死也一軍咸嘖嘖曰義士後人有見山海關石頭大刻曰大明忠臣朝鮮義士李士龍死時年四十七賜祭錄後

熱河日記

朴趾源

崇禎十一年我國將李時英率兵五千入建州清人劫時英爲前行與明都督祖大壽戰於松山士兵皆精砲祖軍多殲下令軍虜頭一顆予銀五十兩鮮人一級予銀百兩士兵李士龍星州人也

獨礮義不八丸三發無傷欲以明本國之心也清  
人覺之遂斬士龍以徇祖軍望見皆大哭大壽乃  
大書旗上曰大明忠臣朝鮮義士李士龍以風時  
英今星州有王川忠節祠卽義士俎豆之所苟使  
皇帝聞義士名合當特予美諡余過松山作文  
以吊義士之魂

李義士公忠節錄卷之一

李義士公忠節錄卷之二

王川書院初建通文

承旨裴正微

嗚乎五十年來有憤而無以泄有辱而莫之洗包羞忍恥降志屈身一脉公論之在於草野者亦復抑而難伸結而不解輪困拂鬱無所依無所托而人情易變見聞既熟間或歸之大小之勢以爲固然之事而不復知愧則天叙民彝幾乎斁絕矣惟我李義士以出身之子爲御營之旗揔則乃是一軍人也而奮然特起毅然獨當出萬死不一生之計明大義於天下扶萬古之綱常使人人皆知其

可恥皆知其可憤皆知其天叙民彝之不可斁絕而吾人之所以存之於膏臆而不能發之於事爲者隱然有以小暴於天下天下之人亦有以小見吾人之本心而一脉公論之無所依無所托於義士之一身則乃是五十年後士論之所倚重而歸仰者也若使義士用於楚襄王之時則必不肯以六千里之土地而爲役於讎人若使義士用於宋高宗之世則必不肯以聖旌旗之中原而稱藩於仇國其所樹立卓卓乎不可尚已至於顏常山張真源之貞忠大節日月乎宇宙而當其時旣無憤

而難泄辱而難洗一脉公論無所依托有如今日者則士論之所倚重而歸仰者亦有間矣此忠烈祠之設立所以歸於士林而爲斯文之盛事者意實在此若泛以忠烈祠論之則表異崇獎之典在於朝廷非士論之所當專主也或有以爲此忠烈祠異於書院非斯文之所當主云爾者亦非知今日之深意者也嗚乎衣君衣食君食响濡於君榮寵於君而乃反忘廉喪恥舍義偷生者何限今此李義士則其有响濡榮寵之可以爲恩而難忘者乎於此而既有萬不獲已之起送於彼而又有

五誘七脅之威迫雖使勉從亦無可罪而特其忠義之心根於天性凜乎其不可犯確乎其不可奪而視死如歸甘死如飴使之可殺而又使之起敬裹屍途還不棄置於沙場則其與衣君食君受君之恩死君之事者又不爲高出一頭地乎雖曰節無大小易地皆然而其所遭遇之不同所立之尤高則必有可言者矣茲故此中論議必以鵲村爲立廟之所而不小變者欲使後人之經過而瞻望者明知此廟之爲義士設而一脉公論之抑而難伸結而不解輪囷拂鬱愈久而愈激者賴是而暴

盡而無餘也公論之所依托而士林之所倚重者  
爲何如哉

王川書院上梁文

衛率張 錄

述夫天地鍾純剛之氣亘萬古而長存山岳殫  
礪之精聳一世而特立雖復刀鉅在後不足以動  
其心鼎鑊當前莫得以奪其志所以十載燕獄文  
祥成殺身之仁一髮常山顏卿效斫舌之節何所  
獨無忠烈竊有欽此夫公迺者漢日淪精燕脂暗  
塞三綱掃地收正氣於山川隻手擎天孰義士於  
河朔遠應徵兵之檄公作負羽之行思 皇明父

子之恩知有死節念我國君臣之義誓不生還卻  
犒之初心已堅永絕妻孥之戀臨陣之忠憤益烈  
每發砲丸之虛七脅冒威凜凜神氣之不屈一縷  
捐命慘慘天日之無光雖以錫奴之獍尚嘉熊掌  
之取鴨綠江上榮返馬革之骸魂山海關頭燠揭  
龜趺之名姓層光偉節軒宇宙而激仰大義貞忠  
盪日星而回薄賻以窆賜以祭優寵眷於漢儀官  
其子復其家侈哀榮於周典凡在一節之善士獨  
薦醴牲矧茲萬古之貞忠詎闕俎豆輿情久鬱於  
欠享公議始行於建祠瞻彼王川之遺墟歸然棟

宇之新搆英風豎髮彷彿孤竹之清風白日當簷  
依佈照窓之涼日三靈不泯激雷霆而振寰宇一  
氣尚在作山河而壯 本朝英雄淚之滿襟志士  
感之填臆春秋揭亨雖有所於安靈冬夏講磨奈  
無地於肄業爰謀爰度縫掖武弁之齊聲之經之  
營工匠財力之畢舉神護鬼設蓋亦有待於今焉  
地秘天慳人謂斯何於昔矣行人指點瞻棟桷而  
長懷過客參尋奠椒荔而磬折尊周正名之意其  
所在茲扶綱植紀之風可述於此煙雲靄其變態  
洞壑爲之增輝贊舉脩梁聊綴短唱拋梁東金鷄

叫罷海升紅 大明朝旭來相照猶想當年未死

忠拋梁南洛水蒼茫雲影涵赫赫英聲流不滅千  
秋毅魄死猶甘拋梁西回看中土日相低誰憐崖  
海皇舟沒前後忠魂庶共攜拋梁北上有金烏浮  
翠色節義從來聳華夷光爭砥柱中流植拋梁上  
衆星皆拱北辰向惟餘一片炳丹心能使後人起  
敬仰拋梁下白石清泉鎖遠野遺憤至今猶未攄  
故教流水咽中夜伏願上梁之後俗知趨慕士仰  
風聲嗟吾黨盍各勉旃佇見彝倫之大闡其自今  
欽于永世庶聞名節之蔚興

王川書院奉安文

牧使吳道一

穹壤之間曰有正氣天實卑公烈烈其志在歲龍  
蛇賊奴肆獠大膊于錦徵我師旅公編卒伍亦在  
遣中慷慨一死已矢于衷西垣卻犒就親辭設兩  
軍相當空砲輒發公不秘諱爲賊餓酷公曰天  
朝卽我父母子於父母焉忍施砲義形于色舌奮  
髮豎人或勸公謝過自效徒聒公耳詎奪公操竟  
蹈白刃鴻毛七尺炳然腔血蠻貊亦服旣返其屍  
載鐫于石曩昔之事言之於悒冠裳顛倒天地閉  
塞中華禮樂舉將淪滅公生外服獨能抗節倫常

之重職公以植夷夏之分由公以析百世永賴霜  
嚴日烈西山之餓東海之蹈公實伯仲一揆前後  
維星一區寔公攸產星人慕義沒世仰鑽合辭同  
聲鳩財聚工于彼王川肇創靈宮昔公所遊公必  
依移虔奉香火永世爲期今當揭妥敢薦菲薄不  
昧者存永垂歆格奉安時山長前縣監張鉢獻官  
前郡守李坡前縣監都處亨學  
正都永夏士人二十五人鄉校  
儒生七十餘人武弁百餘人

春秋常享文

前人

伏以撐天節義貫日貞忠式賴扶綱永世欽崇時  
值仲春秋日屆中丁謹以粢盛牲幣用伸常享

忠節祠記

前人

君臣之義本於秉彝而歷觀往古牒記人臣取尊  
官享厚祿衣君食君於平居無事之時及夫臨難  
邁危能奮不顧身捐生抗義者蓋絕少焉况名編  
卒伍未嘗沾一命之恩者乎冠儒冠服儒服學問  
詩書高談道義之士鮮有不偷生惜死喪其素守  
於倉卒板蕩之際能松栢於歲寒勁草於疾風者  
亦未之多見也况身操版鐻未嘗讀一卷之書者  
乎至若朝夕於廈簾左右於凝旒君臣之間恩義  
之密若家人焉父子焉而尚難慷慨奮發辦熊魚

取舍之分於國危君辱之日况生海外偏荒爲  
天朝致命殉義者尤豈非間千百代而罕覲者乎  
余於李義士事未嘗不豎余髮而拭余涕也曩昔  
之事言之氣塞歲庚辰清人之役於錦州也徵我  
國兵義士以砲手在調遣中臨行不食官犒就父  
母別語妻孥曰吾死不旋踵矣若等善養吾父母  
既至軍清人與大明官軍交戰義士所發砲皆  
空砲也有聲而無丸同儕怵以死生且教以等欺  
寧匿丸義士曰我欲明白死隱匿苟活非我志也  
清人果覺而詰之義士奮然曰天朝於我國義

君臣恩父子若砲我 天朝人則是子弑父臣弑  
君天下豈有是理辭氣益激烈不撓清人怒欲刃  
之或勸其謝過自效以免死不從竟被害清人義  
之歸屍於本國後見山海關城頭刻大字有曰大  
明忠臣朝鮮李義士五誘七脅終不放一丸而死  
吁亦烈哉方義士之死也天地閉塞冠裳顛倒中  
華禮樂文物之盛舉將淪胥於犬豕腥膻之穢而  
義士以偏荒卒伍之賤本非談經史學道理以士  
行稱者而乃能鴻毛一死躬蹈白刃吐片辭以明  
君臣之義夷夏之分於穹壤之間百世之下使蠻

貌之人亦知其貞忠大節足以植天常而扶人紀  
苟非亘古今撐宇宙純剛至正之氣鍾于其人其  
何能乃爾倘所謂萃乎泰山不足爲高昭乎日月  
不足爲明者非歟義士星山人也昔我 仁祖大  
王使本州牧崔有淵祭其墓 顯廟朝因御使南  
九萬言官其子 列聖褒嘉之典亦至矣而公沒  
五十餘年星之人始鳩材建祠工告訖將妥靈而  
俎豆之屬余忝長于星朞爲文以記其事余旣慕  
義士之風又多星人之能崇節義而樹風教如此  
遂不辭而書義士諱士龍出身廷建之子祠宇在

今星州之治北所謂鵲村王川者蓋公平日所居云

表忠詩

欽差太學士福州胡寧齡

生長仁賢禮俗宗橫砲三復死從容大明忠節

朝鮮義天下皆知李士龍

題銘于石在錦州衛松山下

忠節祠題詠

葛庵李玄逸

憶昔金甌鉞又全

鑾輿還奠舊山川毫毛實藉

聖神帝骨肉渾由仁覆天舉世徒知清憲曆何人

夏記

大明年賴公一死民彝著崇報寧徐俎豆

虔

又

承旨裴正徽

卻犒心非在苟全點行無奈渡龍川孤懷磈兀難  
爲地一死丁寧已矢天想得藏丸錦衛日真如採  
巖首陽年尊周大義昭千古遺廟于今此揭虔

又

衛率張 錄

忠貞何待世家全隻手能回旣倒川志凌辭親西  
赴日身捐罵賊北望天編軍效節無前代死國成  
名聳萬年立廟遺墟安毅魄至今人過各致虔

又

翰林李柱天

平生義勇自雙全卻犒辭家渡薩川慷慨藏丸誠

貫石從容蹈刃節磨天一身功在三韓日再造恩  
酬萬曆年修墓恤孤鴻渥備舊墟新廟後人虔

又

牧使金一夔

編伍人中節義全英風猶灑舊山川身捐錦衛干  
戈地首戴皇明日月天毅蹟獨傳荒落歲靈宮  
新就困敦年不惟舉國皆矜式殊俗當時亦致虔

又

郡守都處亨

純剛一氣得之全烈士遺墟是玉川俎豆方新箕  
子國溪山依舊大明天捐身組甲三千列扶我  
綱常億萬年永樹風聲端在此願言香炷久彌虔

又

郡守朴行義

地因人勝美雙金星是山名王號川默想雄心凌  
白日信知高節競蒼天褒忠錄裔優殊渥建廟安  
靈爲永年遺址獨畱明日月摺紳章甫亦咸虔

祭墓文

牧使崔有淵

嗚乎自古死義成仁之士漢有綿竹之諸葛唐有  
睢陽之許遠者往往出乎當時士大夫其平日所  
講者義理也所任者帥臣也所佩者成敗也及至  
板蕩之際能擇熊魚之辨則所當不顧喪元惟執  
一箇是而已而猶能卓立乎萬夫之上輝映於百

代之下而今公之死松山也問其處則卒伍也問其任則砲兵也問其行則清人之援助而明朝之倒戈也其與諸葛之於綿竹許遠之於睢陽所處不同所任又不同而惟其一死之志已矢於黽勉從事之日萬折之衷自激於江漢朝宗之地將軍之號令在上而不足奪我鏈子之闐哮在前而莫能屈我以匹夫士芥之賤辦鴻毛泰山之舉不意綿竹之孤節睢陽之餘風復作於錦州今日而使其爲東土士大夫者不覺汗其背而泚其頰則不徒不可以成敗論其英雄而亦不可以貴賤尊

卑亦大丈夫也噫虛砲一聲天下聞而知有人裹  
革萬里宇宙光而欲生氣令我東方衣帶之國誇  
爾南朝忠義之士則庶無愧於小中華稱號而尤  
有光於松屋句古事矣吾將酌崖海滔滔之水挹  
易水蕭蕭之風招公魂於青霜皓月之夕銀河北  
斗之夜倘有光茫橫截長空御青霓鞭紫霆閃鑠  
而不可捉鬱崱而不可解則始信公之純精烈氣  
凝結於天地間而不滅愈光將欲去化為沙椎筑  
鉛擘破龍庭盪掃羊腥否公其不死來些來些一  
杯之奠故鄉之悲

祭廟文

崇禎後甲戌四月二十二日

牧使吳道一

穹壤正氣金石貞操龍蛇曩事聞者髮豎空砲不  
丸大明有臣由公一死人紀不泯臨刑片辭凜  
凜腔血返屍銘珉蠻貊亦服西山之餓東海之蹈  
萬古雲霄一揆前後公維星產邑人慕風昔公所  
居有翼靈宮余吏乎星實相斯役虔薦泂酌冀斯  
歆格

謁廟文

咸豐李有仁

數畝明宮萬古精忠一來瞻拜倍激秉衷

又

礪山宋必興

忠貞堂志卷之二  
儼然一字褒忠萬年

皇明日月獨留王川

墓表

翰林李柱天

金蛇歲錦州盤清徵兵公點行辭親時立節期心有丹砲無丸逮盤問詞氣奮於萬曆德因極雖九死忍一害擲藏鉛飴絕膳殊俗義聖儲極命羿樞祭以侑婦繼廩男爵蔭恩前後風聲樹最偉蹟質貞石李爲宗名士龍生乙未考登第顯之詩永厥垂

墓碣文

崇禎後丁卯八月立

牧使鄭載岱

義士姓李諱士龍本星州良家子也父廷建武科

義士 萬曆乙未生于州北鵲村自少以慎默見  
稱及長隸砲手歲 崇禎庚辰錦州之請兵也義  
士亦在調遣中每臨陣輒發空砲清人覺而詰之  
義士曰 天朝之於朝鮮義同父子何忍殺傷清  
人怒欲斬之或勸其自效竟不從被殺乃辛巳四  
月十日也清人義而歸其屍其年九月葬于故山  
之側妻完山李氏有男女各一男曰善善有三男  
二女男卽元發元碩元儀在昔壬寅今領議政南  
公九萬以繡衣到州周恤其家還 朝上聞錄其  
子善補漆浦萬戶自官立石記其事蹟以示永久

云

墓道碑陰記

崇禎後戊辰仲秋立

執義閔遇洙

崇禎九年丙子虜東搶我我國家剪焉傾覆以

與虜和時則三學士以斥和議被虜殺死明大義

於天下至庚辰虜又西犯天朝徵兵於我時則

清陰金文正公上疏言其死不可從夫以外國陪

臣爲天朝效節實天下古今所未聞其爲國家

之光大矣然此猶是士大夫之賢讀書明理講君

臣之義者也若星州李義士以卒伍之賤不忍助

犬羊而攻父母以金文正之義成三學士之死不

其偉歟嗚乎此爲義士之墓也在州治之北幾里  
至今過者皆指義士之墓而致敬焉義士諱士龍  
本良家子編於軍籍當訓局之發精銳以應虜求  
義士亦在其中初至州默然逢點及行州牧親犒  
以送酒食甚設義士不食曰聞以我等爲虜用以  
犯 皇帝國我何忍食此我心已有所定矣於是  
直上坐州牧座或偃仰或箕踞州牧顧不禁也旣  
至錦州衛松山舖虜與天將祖大壽對陣虜愛惜  
我兵技精庇馬鞍下防矢石發砲中者輒重賞之  
義士發砲不凡虜覺之猝出而擬刃於頸曰敢如

是耶中則必有重賞又發砲而又不丸虜甚怒猶不殺至於三則遂亂斫而死時辛巳四月十日也天將謀知此事卽揭一大旗于陣前大書其上曰大明忠臣朝鮮義士李士龍虜亦義之許同仇收屍歸葬年四十七妻李氏有一子曰善鳴乎朱子嘗表章唐衛士之忠烈義士與衛士類也大抵皆不失仁義之良心而義士尤難矣始義士之將行也其時州牧卽余曾祖觀察使諱光勳也我仲祖文忠公諱鼎重我祖考文貞公諱維重尚幼方在側見義士偃仰箕踞狀請責其無禮觀察公曰是

何言也我聞其言不勝愧屈矣其後文忠公以此  
事語于尤庵宋文正公先生爲之立傳以示後且  
告于筵席曰裒世尤宜崇獎節義顯廟命除

李善職遂爲漆浦萬戶嗚乎今去義士之死百有  
餘年矣文忠公之曾孫百男爲星州牧輒慨然曰  
此吾先祖所莅之地而文忠公所欲表闡義士事  
者其義炳然余何敢不力於是蠲免其後孫賤役  
官備祭需以享之又伐取一石以表其墓以舊表  
文字大略令余記其陰謹据宋先生傳文書之如

此云

本州牧使  
閔百男書

豎碑告由文

牧使閔百男

惟公毅烈日星爭光庚辰師役獨扶綱常卻犒不受高踞公堂其言如鉞其氣如虹我祖撫臨感激于中一死成仁血暴華夏歸骨故土不絕香火今余來莅新此封塋斷得貞珉大揭崇禎惟茲二字庶慰英靈

神道碑銘并序

死非難死於義難死於義非難死而從容取義爲尤難昔宋之文山不死於張弘範見執之日而死於柴市我朝之三學士不死於南漢係累之日

而死於瀋陽者用是道也義士李公其亦死而從  
容取義者歟公始以勇隸御營 仁廟庚辰赴錦  
州之役蓋助胡攻 明也雖爲彼所嚇豈 朝廷  
之本意哉公泯默受點者爲 王命也卻犒踞倖  
者微見志也蓋亦莫非義也觀其拜母設妻之言  
膏中已辦一死而隱忍於周歲之間及到虜陣故  
放虛丸清人誘脅而終不撓以死蓋以 皇朝於  
我有父母之恩而目見天兵累累就盡於孤城之  
下而吾乃助犬羊而搏噬之是可忍也孰不可忍  
也蓋前此而死之則爲浪失此而不死則爲翫此

是義理等底金秤上稱出來者而貫日之忠華夷  
皆見凌霜之節天地亦動故屍骸未冷而祖將揭  
義士之旗旅襯將返而昭顯世子時在瀋陽賻  
槨而送之仁祖大王又下祭墓之教顯廟壬  
寅因御史南九萬啓官其子廩其妻我正宗  
大王尤惓惓於此事旌褒有加則贈及於州牧  
祭棺不謹則責加於道臣嘗教曰辛巳之舉若  
無李士龍一人則何以有辭於天下後世乎其後  
有宣額於王川祠焉有命旌閭焉有給祭  
脩焉有親撰祭文焉有命搜訪忠臣子孫錄

用焉崇報之典於是至矣始公之點兵也閱老峰  
鼎重隨父在星州任所目見其箕踞偃仰之狀其  
後言於尤庵宋文正公勸其立傳而備載其事尤  
庵亦嘗白 上曰表世宜獎節義如李義士合施  
褒典其後吳西坡道一州牧崔有淵鄭載岱閔百  
男閔執義遇洙崔梅窩麟張衛率錄裴孤村正徽  
李廣瀨野淳都郡守處亨李翰林柱天吳參判顯  
相許文憲傳諸公前後相望或承 命祭墓或奉  
案立石或撰述或上疏而州之人士尤終始奔走  
焉嗚乎公之死義而報之亦以義山海城頭之刻

天下之報也 列聖朝褒崇之典國家之報也諸

賢撰述之文國人之報也公之後孫又豎神道碑

於今所居鳳山之里祠廟之前是子孫之報也公

之十一世孫鴻基請銘於種杞種杞又公之鄉人也

敢不報謹按公星山人諱士龍字仕中上祖星山

伯諱能一考諱廷建武科妣令人居昌劉氏宣

廟乙未生公于州北望星坊鵲村里立懂時年四

十七實辛巳四月初十日也是年九月禮葬于故

山寅坐之原配 贈淑夫人完山李氏附子善忠

良科萬戶孫長元發次元碩元儀曾玄以下不錄

銘曰

位不過執戟而立節 皇朝古今罕聞學不能通  
經而臨死盡義君子猶難惟其所鍾者純剛至正  
之氣而所知者尊君親上之義顏常山之指衣若  
濡有溫唐衛士之殉國見賊斯忿率乎泰山昭乎  
日月不足爲高明大而天下小而一鄉備盡乎哀  
榮 屢朝褒忠之舉增光聖德諸賢誦義之作正  
闡偉蹟鳳山之里諸仍是保斲石于山用表神道  
豐碑有儼想毅節之特立遺廟密邇冀英靈之宛  
接通仕卽行義禁府都事全義李種杞謹撰

遺墟碑銘并序

天地之運有陽九之窮而天下無道將爲禽獸之  
域則天必生名公巨人扶持得通天地亘古今所  
不易之倫綱使天下之人曉然知夫君君臣臣父  
父子子之義 國朝南漢之辱有剗其腹而雉其  
頸又有視鼎鑊如平地者皆是也及辛巳錦州之  
役義士李公死於王事抗大義而樹大節蓋嘗言  
之南漢諸賢皆名家世臣夙講春秋之書固知尊  
周之爲義也若公則人微地卑若是乎其赫赫轟  
轟而扶綱常於百代震大名於華夷也公諱士龍

字仕中高麗開國功臣星山伯諱能一后 本朝  
郡事汝信十世孫也考廷建武科妣令人居昌劉  
氏 穆陵乙未公生于星州治北鵲村之第及長  
以勇隸御營方建奴之徵兵於我公以善砲選臨  
行語家人曰我未必生還善事老母州牧大犒軍  
以送公卻不食上堂箕踞坐以慢之示其志也及  
到虜營我師利虜誘天兵應丸輒斃公不以丸而  
故放虛砲虜覺而詰之公曰吾有丸而不放不欲  
助汝也虜縛致軍門脅以威而誘以利五誘七脅  
終不屈乃曰 大明我父母也以子攻父寧有是

理吾不忍助爾犬羊害我父母罵不絕口遂死之  
天將祖大壽聞之揭旗特書曰大明忠臣朝鮮義  
士清人亦義之立石山海關刻朝鮮義士使還柩  
本國我 昭顯世子時在瀋陽賻襚而送之太學  
士胡齡寧作表忠詩刻石于松山下我 憲文王命  
道臣禮葬而下祭墓之教 彰孝王壬寅因御史  
南九萬啓官其子廩其妻 莊孝王癸丑贈通訓  
大夫星州牧使 命旌其閭又命以傳教揭板禁  
軍廳及星州政堂 親製文致祭其廟宣教官誤  
書虜中年號祭之日神降靈異 上聞之責道臣

越捧罷禮官職擇日再祭 教曰辛巳之舉若無  
李士龍一人則何以有辭於天下後世乎戊午  
命參錄 皇壇六十四人錄用忠臣子孫而許參  
祭班噫忠臣之報國義士之殉身自古何限爲人  
臣而不通春秋之義全軀而背國者又自古幾人  
以公之地辦公之義窮千古而邈乎其寡儔矣  
列聖朝崇獎之典可謂至矣後賢諸公爲之撰述  
而揄揚之者指不勝屈而尤庵宋文正公嘗以相  
臣建白曰衰世宜獎節義如李義士合施襲典又  
嘗立傳而細述之後人讀其文悅然如見立殯時

事有足以鼓發人之忠義之心而不忠不義者知  
所懼而戚矣先是肅廟壬申鄉人建王川祠於  
公之舊里爲俎豆享正廟癸丑賜額忠節後七  
十六年大行戊辰以朝命撤今其遺墟尚在而  
士林無羹墻之地行人興葵麥之歎吁可悲也昔  
唐衛士之一時懷碑尚有越中之血食以公之貞  
忠大節其可以泯滅其遺躅歟其後承方豎碑於  
院廟遺址以徵於後世而謂不佞年老而知言來  
請銘竊念不佞亦崇禎遺民也寤寐皇明不  
勝彝衷之感激而且吾先祖訢梅公實創王川之

役頌其櫬偉高山景行雖百世而又可已耶義不  
可以不相是役也配 贈淑夫人完山李氏子善  
忠良科漆浦萬戶孫元發元碩元儀餘不盡錄銘  
曰

大專盤氣正直純剛上蟠下際烈烈其光鍾而爲  
人公乃受之所受伊何大柱天支往往龍蛇天步  
孔棘再造東方伊誰之力紅羅萬年父母孔邇噫  
噫南城忍說其恥天綱倒置教子攻父公於是時  
義血盈肚虛砲一發震動天下虜頑亦伏歸尸革  
裹 王曰嗚乎余嘉乃績祖宗之志維汝暴白匪

汝一人曷由有辭乃馳乃祭乃旌乃祠俎豆旣撤  
遺墟草鞠山哀浦息風猷可掬乃立貞珉以告來  
人嗟我東人尚保彝倫苟有彝性敢忘公功王川  
之陽過者必恭仁州張錫英謹撰

家廟告由文

崇禎後四甲寅仲春移建鳳山

後孫奎豐

粵在 仁廟仍令州牧文以侑之粵在 顯廟以  
官以祿俾榮後裔粵在 肅廟建祠遺址欽崇永  
久粵在 正廟列于忠勳旣旌遺閭特降優典世  
祿奉祀旣殊常例殆類不祧嗟我後孫散處茲土  
惟昔祠宇移于租谷幾乎頽廢無所矜式仰念舊

烈夙夜憂惕龜兆告新鳳山協吉一門齊力數間  
纔成斯焉將事敢告英靈於千萬歲是享是侑敢  
薦酒脯虔告謹告

王川書院重修告由文

崇禎後壬戌九月日後孫應甲

初建歲久風雨飄震壁土剝落廟貌荒涼諏謀卜  
吉爰度改修茲以移安謹告厥由

還安告由文

同日州牧奉送香燭

廟壁將頽斯文堪嗟爰謀重緝維新孔嘉舊貌既  
完吉辰茲涓於焉還安謹告厥由

移安告由文

崇禎後丁卯八月日

後孫養城

廟宇傾危敢用修理茲以吉辰移奉廳事

還安告由文

同年九月

修理既訖廟貌重完茲仍吉辰奉告還安

移安告由文

崇禎後巳丑九月日

後孫培根

重修歲久廟宇傾頽方營完葺移安敢告

還安告由文

同年十月日

屋壁重修廟貌斯完爰擇吉辰奉茲還安謹以翰

音庶品用伸虔告

移安告由文

崇禎後庚寅二月日

後孫賢模

廟宇歲久風雨滲傷今將修理移奉講堂謹以清

酌庶羞用伸虔告

還安告由文

同年三月

既修既理廟貌重新茲涓穀朝敢告還安

王川書院重修記

崇禎紀元後  
四丁丑五月

李東晟

本院之刱建在昔壬申而中間累度有修葺之舉  
挽近以來廟宇與講堂養賢齋爲風雨所朽傷故  
鄉之人登是堂者莫不言念在茲歲丁丑不佞以  
昧事鄉末冒忝任司於是乎鄉議攸同遂謀重修  
之道屬余主管兼以判事監任顧此院勢凋殘事  
巨力絀萬無了當巨刱之役則其責重任大僂同

焦僥之扛鼎就緒之期全沒計策而迺者請助鳩  
材先修廟宇與講堂改建養賢廳三間中門二間  
幾歲餘功告訖固不無費勞神心之端而自顧無  
似亦是添一誇張何敢僭爲說記其事而略叙顛  
末云爾

撤院埋安告文

崇禎後庚午二月日

後孫道豐

氣數騰變粵歲重光吁彼錦役爰庸執斨卻犒誓  
志斷斷靡他及交矢刃虛砲三挖猾奴誘脅竟不  
搖衷旣辦大義舍魚取熊捐身蟻地鴻毛一輕山  
海刻石忠義炳明靈幡故國草木光榮王川尸祝

允合輿情 聖廟褒獎宣額報崇 命撤俎豆八  
域混同時運太屯不辨忠良多士齎鬱莫翹彼蒼  
斯乃奉版就瘞于岡膏填氣痞涕淚其洶

旌閭重修上梁文

崇禎後五  
辛卯仲春

金台應

伏以柱天柱地萬古不死者非義理乎耀國耀鄉  
重修如新之此旌閭也 大明何世小華有人伏  
惟 贈牧使義士李公正氣所鍾乖運適值其事  
則弓馬砲劔曾讀夫一部春秋于時焉酋蠻腥塵  
敢仇我大邦華夏事在莫可奈黽勉從軍心有所  
不爲慷慨卻犒膏中之砥柱素定有死無生頭上

之日月朱明斷一不二千金何物不爲誘脅而有  
動撓三砲不丸寧以臣子而害君父一天下無二  
天子壯哉言乎百世後如一世人聞其風者祖將  
有特地之異表揭一竿上姓名虜人亦葬天所同  
收送萬里外身首裹馬革而歸葬于鵠取熊掌而  
所欲非魚山海關頭聳萬國行人之視王川祠額  
副一省多士之疏文正公文憲公前後作傳三學  
士一衛士今古有倫旌自 正宗大王歲在癸丑  
贈以本州牧使秩非尋常苟有廟宇之崢嶸凜  
宇若當日氣像尚以 恩綸之揭刊煥然是 烈

朝光華鳴鳳山山水增輝朝鮮國國家偉蹟歲月  
滋久爲子孫者誠力愈勤榱桷重新與丹青而忠  
義俱炳是所謂百代不朽者其可無一言以頌乎  
要贊舉梁敢效獻律拋梁東天地煒煌義理中三  
月皇春回一度庭前花發大明紅拋梁南鳳凰山  
色翠生嵐當年一死猶未死如此方爲七尺男拋梁  
西秦岳雖高不足齊過此何人不踟躕中原遙望  
尚悽悽拋梁北浮雲矗矗上天直倚歟一辦聳華  
夷萬古綱常於此植拋梁上松巒終古碧千丈冥  
冥泉下孰從遊衛士文山相揖讓拋梁下寄語東

人西去者過錦若聞虛砲聲誓將虜首血原野伏  
願上梁之後風烈所在星嶽增高鬼護神扶亦知  
此閣之義其義臣忠子孝皆以我公之心爲心

檜淵書堂通文

崇禎後五月辛酉五日

伏以孔子曰白刃可蹈也中庸不可能也考亭子  
釋之曰必取於行而無擇於義未必從容而中節  
若未有偏倚過不及之差而一出於至誠無息者  
有可以殺身而成仁則豈非所謂既捨其生又合  
其中者乎本州義士星山李公天下士也跡微分  
賤勇隸御營時則皇明運迄天地閉塞歲在庚

辰胡虜亦援豈朝廷之所欲哉及其受點編伍

王命也遂泯默而強志八廚設妻曰肯養吾母  
乎州官之犒義不可食則箕踞以卻之何其慢也  
錦州天下絕域有砲在手有丸在囊鼓鳴旌摧兩  
陣對圓含忍從軍有待今日彼雖誘我我則如故  
綱常至重子不可以攻父乾坤已辨夷不可以猾  
夏既不丸於一砲又不丸於再砲五誘七脅彼雖  
勤於擬刃一身百碎我則凌於中心貨賚不足以  
甘其肚戚鉞不足以畏其頭則輪困大膽動盪于  
宇宙之間只知有尊周而不知有其身亂斫而殉

之者胡虜之不得不爾而公之定筭於是乎成矣  
天將謀知而表旌胡人感泣而收櫬 王子賻槨  
以還國海關刻之以忠義嗚乎公之一死足以千  
古矣三砲虛發可以報 萬曆皇帝東征之恩滿  
腔義血可以湔南漢城下辱盟之恥亂臣賊子從  
此而有惧天經地義賴是而不墜秉彝之天豈可  
地分而有限哉噫卿輔何官士族何名苟卓其節  
微可使顯卑可使榮彼所謂口講春秋之義身服  
君父之恩者亦獨奚以哉視其位則不過爲唐衛  
士之懷磚而考其年則與宋文山柴市之禍一何

相似也天之所以使人立懂必以四十七歲爲期  
耶重有感於義士也然公之世二百有餘載矣安  
靈之祠華額已撤而過者有葵麥之歎紀實之編  
刳役未圖而士林無羹墻之寓此豈 列聖朝崇  
獎之遺典而諸先輩揄揚之意乎況今寰宇陸沉  
邪說橫流彝倫斁絕神人雜糅如可以想清風而  
立懦講高節而振紀者則尤非吾輩惕念處乎今  
於本堂之會峻發修契之議天彝所激豈可鄉道  
而有間哉恭惟全省僉君子孰非我 崇禎涵育  
中遺化也尊慕義士所以不負 皇明則成案之

日無愧爲尊周續錄也另發激仰之義濟濟同聲  
以振頽綱千萬幸甚

晴川書堂通文

崇禎後五年辛酉八月

伏以故義士星山李公當辛巳錦州之役起身卒  
伍罵賊不屈而死使東華尊周之義得以永有辭  
於天下其貞忠偉烈直與金文正鄭文簡尹吳洪  
三學士殊轍而同條嗚乎盛哉始公之沒也明將  
祖大壽揭旗特書曰大明忠臣朝鮮義士虜人亦  
義而歸其屍我仁廟命道臣而祭其墓顯廟  
又祿其子而廩其妻正廟又贈其官而旌其閭

當世之見許 屢朝之崇報蓋亦如此鄉省人士  
亦嘗建旌忠之祠奉以畏壘者延及二百年之久  
忠義之感人心豈其微哉嗟乎今宗國已非王川  
成墟凡前日公私褒獎之蹟一掃殆盡公之後承  
大懼前徽之湮沒方編輯忠節錄思欲繡梓而公  
諸世彝天所同吾黨亦當獎而成之不可屬之一  
家之私事庸茲專告須隨宜設契以濟是書之役  
亦豈非課忠責孝扶植人紀之一大關楨乎僉君  
子有以察納幸甚

道東書院通文

崇禎後五壬  
戊三月日

伏以人性之綱曰仁義禮智無一於此不可以盡  
人之道矣若夫臨事而辦大節惟義爲制宜苟非  
素定于膏中而識其熊魚之取舍則其不以生爲  
重而以死爲輕者幾希矣嗚乎卓哉義士李公當  
其赴援於錦州之戰也謂不可以爲彼而害我父  
母寧此身齧粉非我志也竟不屈而死何其壯也  
編名於軍籍其地也不屑於官牒其氣也強志於  
從軍其職也以其之人若使處於廟堂之上委之  
以軍國之任則危可使安而讎可使泄也乃黽勉  
賤廁不與之俱已者其尊周之義也天將之表旌

胡人之感歎 王子之賻極海關之刻石足以使  
義士暴白於天下而無待於俎豆之奉與紀實之  
編然顧今義理都喪之時如可以仰高義而振頽  
風者則儘盛事也秉彝之天豈以遠近而有貳哉  
望須僉尊終始懋敏以敦契事俾爲遠方之慕效  
千萬幸甚

大邱鄉校道通文

崇禎後五壬  
戊四月日

伏以庾公之斯不忍以子濯之道反害子濯而抽  
矢去金鄒夫子特書之星州義士李公赴錦州之  
役去其凡而發其礫其有見於庾公者乎其心以

爲我大明遺氓豈敢愛區區之喘犯堂堂之王  
師哉公生長田間發身行間不遑用力於經史模  
範乎古人而其所取義能如此吁亦異矣時南漢  
之厄纔四歲有裂國書者有剝腹者有遇害藩獄  
者喧翥宇內皆聞而鑄在膏肓作爲一副義理知  
上國之不可負清虜之不可從矣是以官有犒而  
慷慨不食設父母而托妻以善養蓋已判不復還  
矣及至事露刃脅大呼不屈遂得明白死使庾公  
易地能如此乎庾事師盡其義公事舊國殉其身  
千載庶齊名焉墓而侑閭而旌祠而額又

嘗廩妻銖子贈爵 朝家之典備矣孰不知公之

爲大明忠臣朝鮮義士乎鮮之人近多西入中國  
耕於錦州之野而如聞空砲之響路過於山海之  
關而如見石刻之遺相與歔歔而語曰念舊國者  
以公爲法孰不曰忠臣義士也彼皆以流離顛沛  
之故而足履其地感公之蹟而慕公之義爲吾輩則  
雖未履其地膏中亦自有錦州山海之歷歷也何  
嘗一日忘公之所以事舊國者而况彼流離顛沛  
之由令人次骨而因其足履亦固如覩者乎今聞  
公之裔就不祧廟傍建等忠義堂此足以勸邦人

也伏願僉公爲設契事于茲堂歲一約會講究忠義之道且須錄公實記與四方共之足以爲廣忠義之妙詮也僉諒幸甚

忠義齋銘

崇禎後五月  
辰四月日

顥蒼賦性曰忠曰義遠道靡遠嗜炙無異不由講習維德之懿風疾草勁魚輕熊重念公終始百世欽竦犒餉欲哇陣砲虛掣生行死還默籌已度楊柳依依魂歸雨雪煌煌丹旄霜天欲裂大明忠臣朝鮮義士弘虜漸遁遼伯肩美陽門之死司城猶哭矧彼浙許唐衛祠屋有儼王川我祖是跼蹐

衿佩秩秩裸鬯報祀无疆肅我後生平林忽秋宇  
宙昏盲達馬空山村鵲悲鳴堂搆之責實維來哲  
乃建寢齋鳳岫之出檻櫨鏐業窓櫳轡轡邊榛豆  
鉤靈降蕭炳華額高揭忠貞義烈信行蠻貊禮爲  
干櫓凡百君子不念爾祖瞻楣胥勗斯歌斯聚承  
旨仁州張錫蓋謹撰

忠義齋記

崇禎後五丙辰四月日

惟皇上帝降衷于下民各具忠義之性而鮮有能  
盡其道而全其所賦苟或有之而其出於韎韐編  
伍之列者往牒罕有焉粵惟唐琦之碑投虜而死

龍圖學士吳公修其廟朱夫子書吳公碑記其實而勸其忠義其後千有餘年始有吾先祖義士府君之節死松山噫忠義之以其地得其人有如是難矣哉當時諸賢勅議建王川祠於府君所居之鵲村舊址櫬以頌之板以記之爲鄉邦人所虔蓋府君之全其所性唐衛士之抗死也諸公之餽享記事朱夫子之大其廟而勸其忠義也事之相符并耀今古而世變糾纏儒宮毀圯關里無刑餘之尋竹鹿院爲熙寧之茂草荒涼故墟剩令行路齎涕記曰祖先有美而不揚不仁也吾祖懿蹟雖備

載於天朝褒典邦鄉史乘及羣賢遺集而曾以  
邦禁院宇旣撤無復一架屋羹墻寓慕之所是後  
昆之慨鬱也遂與諸族殫誠竭力乃謀建齋舍於  
鳳山里不祧廟之右經始於丙辰春閱幾月而工  
告訖堂凡三間左右室各一間碣櫬睽衆階阼齋  
齋賓主揖讓之碑幼少肄業之房各有分閫於是  
移奉星州政堂所揭正廟傳教懸板于堂壁上  
扁之曰忠義蓋取八字旗旒書也筭旣落成根  
揚觶而告宗族曰嗚呼天地閉矣新亭舉目無復  
舊日山河則雖欲向國家盡忠義尚可得乎雖然

吾祖立殓之日雙明已晦則人臣忠義之道必於板蕩之際而見之今登是齋而顧其名向國一念克遵吾祖盡忠於皇明故主之義固守舊國冠裳勿染末俗渝薄則盡其心者爲忠行其宜者爲義吾人均賦之性吾祖樹立之烈其在是矣否則歸然一虛閣而止已盡相與勉哉僉曰唯遂綴其語以爲記九世孫成根謹撰

忠義齋序

崇禎後五丙辰四月日

余觀諸賢爲義士公立傳記碑撰述之篇不覺嘖嘖起敬自發吾秉彝好義之良心也蓋義士公以

遐鄉編伍之卒當辛巳錦州之役三發虛砲以明  
不忍傷 皇明父母之兵至於五誘七脅終不屈  
殺身成仁山海城頭之刻虜示義之大旗大書之  
揭祖將褒之天下知東方有忠義之士而悛渝南  
漢之恥也與三學士金文正鄭文簡先生同一秉  
執而使青邱義聲暴白於天下者義士亦尤難焉  
是以許同仇之斂屍 昭顯世子之輿櫬 列聖  
朝崇獎之典皆出誠心嘉悅而究其所以則一義  
字爲之表準也 賜祭時道伯舉行誤書清國年  
號執酌不舉改以 崇禎然後利行可想忠魂義

魄死而不死凜凜泰岳之精烈烈秋霜之氣不欲  
享於犬羊之年號也推以觀之則公之松山舖自  
處豈但一時激發成底義也必其貫天昭日之貞  
忠大節充滿在九曲腔內生死無二致也返葬於  
鵲村故山安靈於王川祠院 國家之崇報至矣  
士林之尊慕極矣今已成邱壠則於子孫世居之  
地建立祠廟而名其左致齊之室曰忠義齋蓋取  
諸大明忠臣朝鮮義士之號於大旗之書也然則  
斯齋斯號卽公已行之迹而後孫之起居斯瞻慕  
斯者豈可不言念爾祖聿修厥德哉天下之義理

無窮事變之來舍取得熊則何往而非這箇義理也公之後孫就廟下建齋舍三間東西兩房一為忌辰虔誠之所一為後生肄業之地其中堂也已未冬後孫某甫請余序建齋之實略叙以歸之大韓弘文館舊吏清州鄭在教謹撰

忠義齋上梁文

崇禎後五丙辰四月日

以為干以為胃有所立於儒行乃肯搆乃肯堂實克揚於先美君子之攸宇人臣而止忠伏惟義士李公早學龍虎之略韜已識熊魚之輕重忠孝根於天性素講乎綱三彝倫閱閱取於人材堪歎其

編伍軍籍每自扼腕奮志必欲捐軀報恩及其虜  
勢東搶天地晦雙明之日月徵兵西赴子弟犯一  
家之父兄小邦助讐賊之侵縱知大義之已蔑微  
臣爲王國之卒敢辭遠征之自勞遂乃卧偃蹇於  
公堂不食牛酒之軍犒生別離於家室遑念鶴埵  
之婦歎千萬里央旆之行爲誰松山館駐寨二三  
聲虛砲之發惟恐萊河兵受傷蹈白刃而忘一身  
誓作地中之毅魄褻丹旌而揭八字赫照海內之  
榮名念昔王院之安靈維我梅翁之勗建韞弓而  
殺人有禮商陽追吳兵之奔抱石而罵賊受刑唐

琦享越廟之祀嗚乎吾黨儒宮之值否運舉國院  
宇之無復存鵲尾之居宅荒墟盡爲鞠草之蕭冷  
馬鬣之崇封古砌惟見寒松之蒼蒼是不但多士  
之齋嗟實亦爲後昆之深慟於是采公議而營新  
室相吉地而協衆心兩峰崢嶸而馬馳宛見將軍  
之赴陣四山週遭而鳳翥殆同高士之色翔窓櫺  
之輪奐貞侈想精靈之陟降上下階阼之制度井  
整分賓主之進退東西百年之彩輝尚留夫孰無  
景仰尊衛之道萬古之義理昭揭至今切思慕華  
夏之忱披曆止崇禎之年不負鄭文簡剝腹之義

抗死作大明之鬼爲誦陳寒山刎頸之詞是所  
謂用夏而變夷亦可見大冬之挺秀庸助虹梁之  
舉載撰燕賀之辭拋梁東朝旭鮮明海氣通紅羅  
日月中天晦一曲長歌淚匪風拋梁西雉峰秀色  
與雲齊河山大陸今何世萬里金陵望眼迷拋梁  
南仙娘舞袖碧如藍蟠桃花盡瑤池遠山上誰呼萬  
歲三拋梁北脫鞘寶釵千金直那得尚方三尺鉞  
掃除胡騎恢邦域拋梁上寰海襟紳俱慕仰秩秩  
儀容賓主階周旋揖讓舊時樣拋梁下晝夜王川  
流不舍聲聲似盪吳江潮偃蹇風神跨白馬伏願

上梁之後川嶽毓精基礎鞏固大爲采細爲楠各  
得匠氏之所宜苞如竹茂如松永垂來世之不替  
茅棟成而山中之客幾作華楣揭而天下之義可  
明仁州張憲遠謹撰

李義士公忠節錄卷之二

其大時忠臣知鮮義士李公之實

報也所以俗生燕獄如後彌者而

執云之役可懷忸怩念旨 宗社之

禍即古崇禎之末也若使水公者在必

能奮忠死我梅風聲於三百世而

世無少人引衣不禁如原莊北之恨和

鳴才國將南漢之唐高祖言武越

四年唐原有銘印之後蓋紀 物廷

之本立而害則冠離而改之定也公

悔行決事以善處分安身夫必死也誰

公庭不食搗饅餠見志也敗乃庸傳

故哉吾從諫而不為知晉之而不

為危氣益至殺方廢悔又何足為

知從家之蓋公編任中今未名習詩書

誦春秋而乃能起於獨親於善友之

上經垂神正直截剝剝乃以扶人紀  
忠貞垂今名於世窮乎忠壯哉夫  
忠有忠忠偉焉乃世之所以感慕欽  
獎也上焉不取然而然者祖將大預之  
書山海城匠之刻乃下之所以慕之

也上而列聖躬恩綸煌煌下而諸天子罔

傲之此無所不備又一國之所以爲泰之

之然之迹蹟教心之在相雜爲不裏

稱爲一焉金書之悲念之或泯此

忠告之所以也也報之成後孫其

將領來石公于世屬余以為之

且安一石公後余固不足以為之

實為之釋素之感遂盟于卒業查

以山陽之崇禎辛巳歲九月未日

南至治城宋後孤往後









**This book should be returned to  
the Library on or before the last date  
stamped below.**

**A fine of ten cents a day is incurred  
by retaining it beyond the specified  
time.**

**Please return promptly.**

EAST-ASIAN LIB. UNIVERSITY OF TORONTO



3 1761 02996 1414

FOR USE IN  
LIBRARY  
ONLY

RESTRICTED SHELF